

D Toggterfamilie Wachter vo Hugelshofe



Uf de mittnächtige Siite vo de Hugelshofer Cherche schtot e Toppelwoonhus mit aapouter Schüür. Dem Huus isch ned aazseche, da do dren öppe vo 1750 - 1860 zwee Tögger, nämlich Vatter ond Soo Wachter, praktiziert hand. De jünger, de Toggter Gopfred Wachter, isch no en "Fraater" oder "Chirurg" gsi, wies doozmol fascht i jemen Dorf an gha het. Di sebe hand di sogenannt "nideri Chirurgii" usgfüert, wie Zei züche, schröpfe, zOoder loo ond sHoor schniide.

De Toggter Wachter aber - us emen alte Hugelschofer Gschlächt, wos jez no Nochkomme het - het sin Pruef gleert. Doozmol sind die, wo Toggter gleert hand, zomene erfaarene Praktiker ggange ond hand sech asen usbilde loo. Es exischiert no e schös Bild vom Toggter Gopfred Wachter, wo en Maa mit eme güetigen Usdrogg zaaget.

De Heirei Wachter, üs no als langjöörige Füürweerkommedant vo Hugelschofe bekannt, isch sin Urgrossenggel gsi. De Heieri het no viles vo sim Urgrossvatter gwüsst. Es isch überliferet worde, da de Toggter Wachter ali sini Pazientepsüech zFuess gmacht hei. Er het sech ka Fuerwerch chöne leichte ond so sei er amel als gwälte Kantonsrot o a dSitzige go Wifelde ond Fraufeld gloffe. DThurtelbaan het jo zo sebem Ziiptunggt o no ned exischiert.

Wo de Sonderbundschiieg usprochen isch, het de Toggter Wachter als eltere Maa no de Weg go Luzern odern dFüess gnoo. Er het sech als Schtaatsbörger för de wichtig Waffegang interessiert ond het die Fuessreis als Schlachtebummler uf sech gnoo.

Er hei Pazienta gha, wo vo wiither zonem cho seied, us em ganze süddtüsche Ruum bis go Karlsruhe abe. Im Wachterhuus sei amel e ganze Vitrine voler Aadengge vorhande gsi, wo danggbari Paziente procht heied.

S isch nünt me ome, vo de Buecher, vo de Gröotschafte, vo den Aadengge - Antiquitähändler hand scho vor vile Joorzeente da Huus usgrumt. Mer hand nu no die mündlech Überliferig.

De jüngscht Soo vom Toggter Wachter isch de "Ame" Wachter gsi. Er isch Puur gsi ond e Zitlang Gmeindame vo Hugelschofe. Mi Grosmueter ht gwüsst, da si amel no zu Ame Wachters gschiggt worde sei als Chend, wen naamer i de Familie en Breschte gha het. Me hei do no bi Ame Wachters Root ond mengsmol o e Mixtur gholt.

Der eltischt Soo vom Toggter Wachter isch den Jakob Wachter gsi. De het o Medinzin gschtudiert ond het den schpöter zNeucherch e Praxis eröffnet. Er isch chenderlos gschorbe. Vo dem Toggter Jakob Wachter exischtiered no Brief, won er als Schtudent ham gschrebe het: Vo Zöri, vo Heidelberg ond vo Würzburg.

Anna Elisabeth Forster, aus "us em Schnitztrog", Huber Verlag